



Politička organizacija građana "Naša stranka"

Branilaca Sarajeva 5/1, 71 000 Sarajevo

Telefon: 033 408 888; Fax: 033 408 881

E-mail: nasastranka@nasastranka.ba

Web: www.nasastranka.ba

Klub zastupnica_ka u Skupštini Kantona Sarajevo

Sarajevo, __.__.2021.

Dostaviti:

Bosna i Hercegovina

Federacija Bosne i Hercegovine

Kanton Sarajevo

Skupština Kantona Sarajevo

n/r Elvedin Okerić, predsjedavajući

Na osnovu članova 117. i 122. Poslovnika Skupštine Kantona Sarajevo ("Službene novine Kantona Sarajevo", broj 25/10, 14/11, 19/11, 7/12, 26/12) zastupnicama i zastupnicima u Skupštini Kantona Sarajevo na usvajanje upućujemo **Prijedlog rezolucije o prevenciji i suzbijanju uznemiravanja na osnovu spola i seksualnog uznemiravanja i nasilja u Kantonu Sarajevo.**

- Oslanjajući se na odredbe Univerzalne deklaracije o ljudskim pravima; Konvencije o ukidanju svih oblika diskriminacije žena, Konvencije o sprečavanju i borbi protiv nasilja nad ženama i nasilja u obitelji (Istanbulska konvencija); Preporuke R(856), br. 4, Komiteta ministara državama članicama o nasilju u porodici; Preporuke R(2002), br. 5, Komiteta ministara državama članicama o zaštiti žena od nasilja, Direktive o jednakom tretmanu u svim aspektima radnog odnosa; Direktive o teretu dokazivanja u slučajevima diskriminacije po osnovu spola – 1997. (97/80/EC – OJ L14), Ustava Bosne i Hercegovine, Zakona o zabrani diskriminacije, Zakona o ravnopravnosti spolova, Krivičnog zakona BiH; Ustava Federacije Bosne i Hercegovine; Krivičnog zakona FBiH; Zakona o radu FBiH i Ustava Kantona Sarajevo;
- Svjesni da je spolno uslovljeno nasilje prisutno u svim zajednicama svijeta bez obzira na kulturu i vremensko razdoblje, te da su žrtve izložene psihičkom, fizičkom, seksualnom i ekonomskom nasilju, te sistemskoj izolaciji koja ih čini još ranjivijima i izloženijima različitim oblicima nasilja;
- Svjesni da je seksualno nasilje i uznemiravanje iz mnogobrojnih razloga manje prepoznato ili nevidljivo, obavijeno velom šutnje i predrasuda, stigmatizacijom i nepostojanjem odgovarajućih mehanizama zaštite žrtava i kažnjavanja počinitelja;
- Upoznati sa činjenicom da žrtve seksualnog nasilja i uznemiravanja nemaju adekvatnu medicinsku zaštitu i psihološku podršku;
- Polazeći od činjenice da se seksualno nasilje i uznemiravanje ubraja u najrjeđe prijavljivane zločine sa najvećom proporcijom „tamnih brojki“;
- Konstatujući da se razlozi neprijavljivanja seksualnog nasilja i uznemiravanja kriju u širokom društvenom kontekstu koji je zagađen postojanjem mitova i predrasuda vezanih uz seksualno nasilje;

- Uočivši mnoštvo prijavljenih zločina seksualnog nasilja i uznemiravanja koji nisu adekvatno medijski popraćeni, a zločinci nisu adekvatno i brzo sankcionisani;
- Prepoznavajući trend velikog broja anonimnih pritužbi na uposlenike kantonalnih obrazovnih institucija putem društvenih mreža i
- Uočivši praksu izjednačavanja uloge i odgovornosti žrtve i počinitelja u javnom prostoru...

...mi, izabrani predstavnici građanki i građana Kantona Sarajevo, predani da osiguramo trenutnu, suosjećajnu, rodno i kulturalno osjetljivu pomoć i podršku svih nadležnih institucija žrtvama verbalnog, neverbalnog ili fizičkog nasilja i uznemiravanja seksualne prirode, kojim se želi povrijediti dostojanstvo osobe ili grupe osoba, ili kojim se postiže takav efekat, naročito kad to ponašanje stvara zastrašujuće, neprijateljsko, degradirajuće, ponižavajuće ili uvredljivo okruženje, a kako bi podigli opću svijest o ovom problemu u našem društvu, pomogli potencijalnim žrtvama da prepoznaju navedene oblike uznemiravanja, te ohrabрили žrtve da prijave preživljena uznemiravanja u s v a j a m o

REZOLUCIJU O PREVENCIJI I SUZBIJANJU UZNEMIRAVANJA NA OSNOVU SPOLA I SEKSUALNOG UZNEMIRAVANJA I NASILJA U KANTONU SARAJEVO

Seksualno uznemiravanje i nasilje je jedan od najčešćih oblika spolno orijentisanog nasilja, koje se najlakše toleriše i za koji naše zakonodavstvo nema adekvatan mehanizam sankcionisanja. Isto obuhvata neželjena spolna ponašanja koja nužno ne uključuju fizički dodir, a osobu dovode u neugodan i ponižavajući položaj te izazivaju osjećaj srama. Ključni aspekt ovog vida uznemiravanja i nasilja je moć, jer ga često provodi osoba koja je na moćnijoj poziciji od osobe nad kojom se ono provodi, što dovodi do situacije da se seksualno uznemiravanje, to jeste ucjenjivanje legitimira kao alat za ispoljavanje moći i uticaja. Seksualno uznemiravanje se nerijetko tretira kao trivijalan problem koji se s lakoćom može izbjeći i zaustaviti, što najčešće nije tačno. Vrlo često se radi o ponavljanim ponašanjima koja se javljaju kroz duže vremensko razdoblje i za koje žrtva ne može naći sistemsko rješenje. Upravo zbog činjenice da žrtva ne može da dobije adekvatnu podršku sistema, društvo u određenom dijelu pribjegava izjednačavanju uloge počinitelja i žrtve.

U tom smislu mi, izabrani predstavnici građanki i građana Kantona Sarajevo obavezujemo Vladu Kantona Sarajevo da, u saradnji sa ekspertima iz relevantnih polja, izradi i u hitnoj proceduri Skupštini Kantona Sarajevo na usvajanje dostavi:

- Prijedlog zakona o sprječavanju i zabrani uznemiravanja na osnovu spola i seksualnog uznemiravanja i nasilja u Kantonu Sarajevo;
- Prijedlog pravilnika o pravilima ponašanja poslodavaca i radnika u vezi sa prevencijom i zaštitom od zlostavljanja na radu u Kantonu Sarajevo;
- Prijedlog protokola o postupanju u slučajevima prijavljenog uznemiravanja na osnovu spola i seksualnog uznemiravanja i nasilja u Kantonu Sarajevo (u nastavku teksta –

Protokol), kojim bi se uveo standardiziran postupak prema žrtvama bez obzira na njihovu dob, mjesto u kojem im se nasilje dogodilo, spol i/ili druge osobne karakteristike, osigurala pravovremena i prema žrtvi usmjerena skrb, koja osigurava emocionalnu podršku i smanjuje rizik od daljnjeg razvoja traumatskih poremećaja, osigurao standardiziran i odgovarajući metod prikupljanja dokumentacije i pohrane fizičkih dokaza posebno obučениh stručnjaka/inja što će neminovno dovesti do veće vjerojatnosti identifikacije, procesuiranja i osude počinitelja uznemiravanja na osnovu spola i seksualnog uznemiravanja i nasilja, osigurala kvalitetna medicinske zaštita žrtvama uključujući pregled, tretman te praćenje zdravstvenog stanja žrtve i osigurala povjerljivost podataka;

- Prijedlog odluke o obaveznom donošenju unificiranih i sa Protokolom usklađenih etičkih kodeksa u svim javnim preduzećima, ustanovama, zavodima i fondovima koje su osnovali Kanton Sarajevo i/ili organi jedinica lokalne samouprave ili koji su u većinskom vlasništvu Kantona Sarajevo i/ili organa jedinica lokalne samouprave;
- Prijedlog akcionog plana za prevenciju i suzbijanje uznemiravanja na osnovu spola i seksualnog uznemiravanja i nasilja u Kantonu Sarajevo, čiji će primarni cilj biti podizanje javne i pojedinačne svijesti o uzmeniravanju na osnovu spola i seksualnom uznemiravnju i nasilju, kao i edukacija o prepoznavanju i ranom suzbijanju ovakvih oblika uznemiravanja i nasilja;
- Prijedlog odluke o obaveznom godišnjem izvještavanju o poštivanju obaveza propisanih Zakonom o ravnopravnosti spolova („Službeni glasnik BiH“ brojevi:16/03 i 102/09) u sklopu godišnjih izvještaja o radu svih svim javnim preduzećima, ustanovama, zavodima i fondovima koje je osnovao Kanton Sarajevo i/ili organa jedinica lokalne samouprave ili koji su u većinskom vlasništvu Kantona Sarajevo i/ili organa jedinica lokalne samouprave.

Mi, izabrani predstavnici građanki i građana Kantona Sarajevo također obavezujemo Vladu Kantona Sarajevo da hitno preduzme korake ka:

- Uspostavljanju ekspertske radne grupe za izradu Akcionog plana za prevenciju i suzbijanje uznemiravanja na osnovu spola i seksualnog uznemiravanja i nasilja u Kantonu Sarajevo, koju će činiti predstavnici Ministarstva zdravstva, Ministarstva unutrašnjih poslova, Ministarstva za rad, socijalnu politiku, raseljena lica i izbjeglice, Ministarstva visokog obrazovanja, nauke i mladih, Ministarstva predškolskog, osnovnog i srednjeg obrazovanja, Univerziteta Sarajevo, Ministarstva pravde i uprave, Udruženja poslodavaca KS, nevladinih organizacija koje se bave prevencijom i suzbijanjem nasilja na osnovu spola i seksualnog uznemiravanja i nasilja i relevantnih radnih tijela Skupštine Kantona Sarajevo;
- Uspostavljanju „Hrabre linije“ za prijavljivanje uznemiravanja na osnovu spola i seksualnog uznemiravanja i nasilja.

S poštovanjem

Klub zastupnica i zastupnika Naše stranke u Skupštini Kantona Sarajevo

Vildana Bešlija

Neira Dizdarević

Vibor Handžić